



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu : Marsu 2012

Edisaun: 22 Marsu 2012

JSMP louva desizaun Parlamentu hasai imunidade Ministra Justisa Lúcia Lobato

Programa ba Monitórizaun Sistema Judicial (JSMP) louva ba esforsu no maturidade Parlamentu Nasionál tanbá kolabora ho justisa hodi ofisiálmente hasai imunidade husi atuál Ministra Justisa Lúcia Maria Brandão Lobato atu livre infrenta prosesu julgamentu iha Tribunál Distritál Dili.

Tuir notifikasaun ne'ebé dirije ba parlamentu iha lora 9 fulan Feveireiru 2012, akuza atuál Ministra Justisa diskonfia (*diduga*) komete iha krime abuzu poder no aktu prátika korupsaun. Bazeia ba notifikasaun ne'e, iha lora 20 fulan Marsu 2012 Parlamnetu Nasionál hasai Rezolusaun Nú. 87/II konabá 'Suspensaun ba Funsan Ministra Justisa' tuir ba artigu 113 (1) Konstituisaun RDTL. Rezolusaun ne'e dekreta hodi definitivamente hasai imunidade Ministra Justisa. Rezolusaun ne'e liu husi votu sekretu ho votus afavor 36 no abstein 3.

Diretór JSMP Luis Oliveira Sampaio afirma katak, '*desizaun hasai definitivamente imunidade Ministra Lúcia Maria Brandão Lobato hatudu vontade di'ak husi membru parlamentár sira tanbá kontribui ba setór justisa hodi halakon dúvidas ne'ebé durante ne'e espalla katak justisa só aplika deit ba ema ki'ik sira.*'

JSMP mós hanoin katak, Parlamentu presiza duni kolabora di'ak ho tribunál liu-liu iha aspeitu justisa atu hametin liu tan estadu direitu demokrátiku no defende prinsípiu dezvoltamentu ne'ebé transparente, sustentavel, no luta hasoru Korupsaun, Kolusaun no Nepótisme iha futuru. Desizaun ne'e konsidera sai hanesan desizaun históriku ba Timór-Léste tanbá ba dahuluk iha Segunda Lejislatura Parlamentu Nasionál hasai definitivamente imunidade husi membru governu ida ne'ebé diskonfia involve iha aktu krime atu ba hatan hanesan sidadaun normál iha Tribunál.

Aliende ne'e, JSMP mós nafatin enkoraza membru Parlamentu sira atu kontinua fó valór no tane aas justisa iha futuru, nune'é bele foti desizaun ne'ebé hanesan mós ba Ministru Adminístresaun no Ordenamentu ba Teritóriu (MAEOT) Arcangelo Leite, ne'ebé parlamentu Nasionál mós simu ona nia notifikasaun no agenda ona dala rua iha plenária. Tuir infórmasaun ne'ebé meja Parlamentu Nasionál fó sai katak Ministra Justisa Lúcia Lobato ható'ó tiha ona pedidu rezignasaun ba Primeiru Ministru, ne'ebé haruka ona ba Prezidente da República hodi fó nia pareser bazeia artigu 86^o alinea h) Konstituisaun RDTL. Tuir artigu ne'e haktuir katak Prezidente

da Repúblika iha kompetesia ba orgaun sira seluk: *Foti, fó pose no hasai membru Governu nian, tuir proposta Primeiru-Minístru nian, iha termu nu. 2 Artigu 105;*.

Aleinde JSMP hakarak dedika JSMP nia apresiasaun ba Minístra de Justisa, Lúcia Maria *Brandão* Lobato ne'ebé hatudu nia vontade no maturidade polítika nu'udar ema polítiku profesional atu hakruk ba ordem tribunál nian ne'ebé derije ba nian. Tuir JSMP atitude ne'e mós demonstra korajem polítiku no responsabilidade nu'udar ema polítiku ne'ebé matura. Iha tempu hanesan, atitude ne'e mós atu hatan no justifika ba dúvida públiku katak justisa aplika iguál ba ema hotu.

Entertantu, tuir agenda Tribunál Distritál Díli, loron julgamentu ba Minístra Lúcia Lobato sei hahú iha loron 14 fulan Marsu maibé adia tanbá Parlamentu Nasionál foin hasai nia imunidade iha loron 20 Marsu 2012. Tanbá ne'e tribunál halo agenda hikas ba julgamentu ba Minístra Lúcia Lobato iha loron 23 fulan Marsu 2012 ne'ebé rejista iha Tribunál Distritál Díli ho Númeru Prosesu : 622/C.ord/2011/TDD.

JSMP hein katak ho rezolusaun ne'e, bele fo fatin ba tribunál atu ezerse nia papel intuituional tuir lei no konstituisaun haruka.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883/7295795